



Bilten

hCa Tuzla

Mjesečni bilten – Maj 2009

- UVOD -

OMLADINSKI RESURSNI CENTAR (ORC) TUZLA; OMLADINSKA MREŽA BOSNE I HERCEGOVINE

Omladinska mreža Bosne i Hercegovine je neformalni skup vanstranačkih organizacija, grupa i osoba koje zadovoljavaju potrebe mladih u entitetima, aktivno ih uključujući u izgradnju demokratskih vrijednosti i jačanje civilnog društva. (Misija hCa Omladinske mreže u Bosni i Hercegovini, ustanovljena na radionici strateškog planiranja u Kulašima, 11. - 17. Juli 1999.g) Danas mreža okuplja 105 članica i 40 pojedinca iz 57 mjesta u BiH (zadnji podatak iz aprila 2009 nakon revizije).

Dragi prijatelji, Pred vama se nalazi **majsko** izdanje mjesečnog informativnog biltena Omladinskog Resursnog Centra (ORC) Tuzla i Omladinske mreže Bosne i Hercegovine.

Bilten izlazi na bosanskom-srpskom-hrvatskom i engleskom jeziku. U njemu se nalaze informacije o aktivnostima Omladinskog Resursnog Centra (ORC) Tuzla, te Omladinske Mreže Bosne i Hercegovine, informacije o mjesečnim aktivnostima omladinskih organizacija i grupa - članica ove mreže, njihovi planovi za naredni period, te ostale korisne informacije (donatori, pozivi na konferencije i seminare, školarine, stipendije...).

Ukoliko želite da budete na mailing listi za naredna izdanja mjesečnog informativnog biltena ili ako imate pitanja ili sugestije, javite nam se. Mjesečni informativni bilten, kao i arhivu dosadašnjih izdanja možete naći i na web stranici Omladinske mreže Bosne i Hercegovine:

<http://www.omladina-bih.net>

Uživajte u čitanju!!

SADRŽAJ

Aktivnosti u Maju 2009	2
Planovi za Juni 2009	4
Aktivnosti dijela članica mreže	4
Nove članice	15
Informacije	16
Donatori, školarine, stipendije	17

AKTIVNOSTI U MAJU 2008.

U toku mjeseca hCa/ORC Tuzla je radio na redovnim aktivnostima - obradi informacija interesantnih za omladinski aktivizam i distribucija istih prema omladinskim organizacijama i članovima mailing liste Omladinske Mreže Bosne i Hercegovine, kao i uređivanju i distribuciji Mjesečnog biltena Omladinske Mreže Bosne i Hercegovine i redovno ažuriranje Web stranice: www.omladina-bih.net.

7. i 9 maja su predstavnici hCa / ORC Tuzla isporučili radionice za učesnike napredne škole, u organizaciji Helsinškog Odbora za ljudska prava u Republici Srpskoj – Bijeljina. Na radionicama je učestvovalo oko 20-tak učenika srednjih škola i fakulteta iz: Bratunca, Bijeljine i Srebrenice.

11. maja u hCa / ORC održan je radni sastanak sa predstavnicima Mirovne akcije iz Prilepa – Makedonija - Goranom Taleskim i Lucie Bilderovom. Na sastanku se prije svega razgovaralo o aktivnostima u okviru "Regionalne akcije za demilitarizaciju svijesti u regionu Jugoistočne Evrope" – zajedničkom projektu nevladinih i mirovnih organizacija iz Makedonije, BiH, Hrvatske, Srbije i Kosova, a pod pokroviteljstvom Norwegian People's Aid-a. Isto tako dogovorili smo i neke detalje budućeg zajedničkog projekta „Regionalna Omladinska akcija protiv diskriminacije“, koji bi trajao od septembra ove godine do kraja 2010. Više informacija o ovome projektu, te o aktivnostima u narednim izdanjima biltena.

13. Maja Tuzlu je posjetio Martin Luter King III sa svojim saradnicima. U okviru posjete Martin Luter King III održao je sastanak i sa predstavnicima nevladinog sektora. Sastanku je ispred hCa / ORC Tuzla prisustvovao Miralem Tursinović.



Martin Luther King III, drugo po redu dijete iz braka Martina Luthera Kinga Juniora i Corette Scott King, već gotovo dvadeset godina motivira ljude širom svijeta svojim porukama nade i građanske učtivosti. Preuzeo je baklju koju je zapalio njegov otac i nastavio tragati za jednakošću i pravdom za sve ljude. Od Mozambiquea do Mississippija, od Israela do Indiane, njegove poruke ostavile su dubok trag na hiljade ljudi.

Kao zagovornik ljudskih prava, društveni aktivist i politički lider, gospodin King je aktivno uključen u mnoge strateški značajne inicijative pravičnog i pravednog postupanja sa svim narodima, u Americi i drugdje u svijetu. Njegove misije su ga odvele u mnoge zemlje širom Afrike, Evrope, Srednjeg istoka i Azije. Sve njegove poruke i inicijative su duboko ugrađene u načela rješavanja sukoba mirnim putem.

21.5. je u Sarajevu održano snimanje TV debate "Mladi i evropske integracije". Tema debate bila je aktuelnosti i problemi mladih u BiH sa posebnim osvrtom na zapošljavanje. Debata je održana u okviru kampanje «Evropska perspektiva Bosne i Hercegovine» u organizaciji specijalnog predstavnika Evropske unije u Bosni i Hercegovini. Debata je emitovana na svim javnim servisima u BiH 2. juna. Na debati je ispred hCa / ORC Tuzla učestvovao Miralem Tursinović.


Tokom maja radili smo intenzivno i na fundraisingu za naredne projekte. Svjetska kriza izgleda ima najveći negativni efekat na fondacije, što je naravno uzrokovalo i krizu među nevladinim organizacijama u BiH, od kojih se najveći broj i oslanja na projektne prijedloge i donacije međunarodnih donatora. Za nadati se da će i ova „recesija“ proći, a svim članicama Omladinske Mreže u BiH, kao i ostalim organizacijama u regionu želimo da im projekti koje su aplicirali budu podržani.



Anna Lindh Euro-Mediterranean Foundation for the Dialogue between Cultures
Fondation Euro-Méditerranéenne Anna Lindh pour le Dialogue entre les Cultures
مؤسسة أناليند الأورو - متوسطية للحوار بين الثقافات

Tokom maja nastavili smo i kontakte sa „Anna Lindh Euro-Mediterranean Foundation for the Dialogue between Cultures“, a vezano za buduće članstvo naše Mreže u toj Euromediterranskoj mreži. Posljednje informacije koje smo dobili govore da je u toku proces evaluacije pristiglih prijava u ALF, te da ćemo u narednih sedmicu-dvije biti obaviješteni o našem mogućem prijemu. O svim novostima ćemo putem mailing liste upoznati sve članice Omladinske Mreže u BiH.

Od iste fondacije dobili smo i interesantan priručnik: Teaching and learning about religious diversity. Bilten je u PDF-u, a svi koji ste zainteresovani, možete nam se javiti na orctuzla@bih.net.ba da vam ga pošaljemo elektronski.



PLANIRANE AKTIVNOSTI ZA JUNI 2009

Nastavak rada hCa/ORC Tuzla na redovnoj distribuciji informacija omladinskim organizacijama u Bosni i Hercegovini, kao i uređivanje i distribucija mjesečnog biltena Omladinske Mreže Bosne i Hercegovine;

Nastavak rada na fundraisingu, te pripreme za aktivnosti u projektu „Yes, you(th) can!“

AKTIVNOSTI ČLANICA MREŽE

KULT Sarajevo

Adresa: Banjska Ulica 2, 71210 Sarajevo

Tel: 033 637 290

E-mail: sarajevo@kultbih.org

Web: www.mladi.org



Udruženje KULT, sa svoja četiri ureda, svojim aktivnostima i djelovanjem u javnom životu nastoji kreirati demokratsku sredinu gdje će vlasti biti partneri nevladinim organizacijama i zajedničkim naporima učiniti život građana/ki kvalitetnijim i boljim.

Centralni ured Sarajevo (CUS)

Banjska ul. 2

71210 Ilidža

sarajevo@kultbih.org

www.mladi.org

Tel./faks: 033 637 290



Projekt Puna usta mladih

Projekt Puna usta mladih postiže značajne rezultate. Predsjednica Komisije za pitanja mladih Predstavničkog doma Parlamenta Federacije BiH 19.5. o. g. uručila je predsjedavajućem Predstavničkog doma nacrt zakona o mladima FBiH, uz svu potrebnu popratnu dokumentaciju. Nacrt je, u skladu s parlamentarnom procedurom, poslan na mišljenje Vladi, a u toku je njegovo prevođenje na sva tri jezika konstitutivnih naroda, nakon čega će biti dostavljen zastupnicima/ama u Domu. Može se očekivati da će se već na narednoj sjednici Predstavničkog doma naći na dnevnom redu.

28. 5. o. g. u prostorijama Centra za mlade u Brčkom održan je sastanak radne grupe za revidiranje nacrta zakona o mladima u Brčko Distriktu. Sastanku su prisustvovali predstavnici nevladinog sektora iz Brčko Distrikta (udruženja PRONI, Vermont i Svitac), referent za mlade u tamošnjoj vladi, predstavnica OSCE-a, predstavnik GTZ-a, predstavnik Komisije za koordinaciju pitanja mladih BiH i projektni tim. Članovima radne grupe pravovremeno je poslan radni materijal (nacrt zakona o mladima Brčko Distrikta, nacrt zakona o mladima FBiH, Zakon o omladinskom organizovanju u RS-u, Zakon o izmjenama i dopunama Zakona o omladinskom organizovanju u RS-u, Dnevni red), tako da je sastanak bio produktivan. Na osnovi komparacije

sa zakonskim rješenjima iz drugih dijelova BiH, članovi grupe mogli uočiti nedostatke postojećeg nacrt zakona u Brčko Distriktu. Značajno je istaći da je radnom sastanku prisustvovala i gđa Anica Radić-Savić, šefica pododjeljenja Vlade Brčko Distrika za podršku MZ i NGO, u čiju nadležnost spadaju mladi. Gđa Radić-Savić obavijestila je članove radne grupe o Akcionom planu, koji je nadležno tijelo naložilo njenom pododjeljenju: izrada nacrt zakona o omladinskom organizovanju u Brčko Distriktu do kraja 3. kvartala 2009. g. Ona je, u odvojenom razgovoru s predstavnicima projektnog tima, iskazala dobrodošlicu podršci Udruženja KULT pri izradi nacrt zakona.

Pisma podrške projektu svakodnevno pristižu. Ured Visokog predstavnika i specijalnog predstavnika Evropske unije u Bosni i Hercegovini podržao je projekt Puna usta mladih.

Tekst pisma OHR-a

„Poštovani/poštovana,

Ured visokog predstavnika i specijalnog predstavnika EU ovim putem izražava svoju podršku Udruženju KULT u implementaciji projekta Puna usta mladih, kao doprinos održivoj i institucionalnoj brizi o mladima putem novih zakonskih rješenja.

Smatramo da cilj ovog projekta – poboljšanje zakonodavnog okvira za organiziranje i rad mladih – zaslužuje posebnu pažnju i podršku domaćih organa vlasti na svim nivoima koji rade ili bi trebali raditi sa mladima i u korist mladih Bosne i Hercegovine.“

Posebno ističemo podršku sljedećih vladinih institucija: Ministarstva pravde BiH, Kantona Sarajevo - Kabinet premijera, Ministarstva za obrazovanje, nauku, kulturu i sport Zeničko-Dobojskog kantona, Ministarstva obrazovanja, nauke, kulture i sporta USK-a, Komisije za koordinaciju pitanja mladih BiH, Općine Ilidža, Općinskog vijeća Ilidža, Općine Jablanica, Općine Kakanj, Općine Čapljina, Općine Bosanska Krupa, Općine Domaljevac-Šamac, Općine Grude, Općine Bosanski Petrovac, Općine Ključ, Općine Vogošća, Općine Donji Vakuf, Općine Kladanj, Općine Gračanica, Grada Mostara, Grada Sarajevo, Općine Doboj Jug i dr.

Škola prijateljstva



Druženja polaznika/ca Škole prijateljstva traju. Riječ je o pomoći pri učenju i izradi domaćih zadataka, kao i igri učenika/ca trećih i četvrtih razreda, svakog utorka i četvrtka u prostorijama Centra.

Kroz radionice i igraonice Škole prijateljstva pomažemo učenicima/ma pri izradi njihovih domaćih zadataka, a također pokušavamo doprinijeti i njihovoj boljoj socijalizaciji. Radionice Škole prijateljstva, održavat će se i u ljetnom periodu, a sve u skladu s potrebama učenika/ca; dakle, ili će se održavati neformalne obuke ili će se vršiti pripremanje polaznika/ca za sljedeći razred.

Polaznici/e su izrazili svoje zadovoljstvo radionicama Škole prijateljstva kroz redovne dolaske u Centar za mlade SPAJALICA, a mi ćemo se i dalje truditi da posjećuju Centar i dobiju adekvatnu pomoć.

Projekt obrazovanja mladih uključenih u društvene procese

U Obrazovno-raznodom centru za mlade SPAJALICA 16.5. je u okviru obuke „Uči, misli i djeluj“, održana treća radionica o temi „Ljudska prava“. Radionicu je držao gosp. Miroslav Živanović. Trenutno teku pripreme za volontiranje polaznika/ca obuke u preduzećima u Kantonu Sarajevu i Istočnom Sarajevu.



Planska igra o EU

Predstavници/e KULTA, kao i novi treneri/ce za vođenje Planske igre o Evropske unije iz BiH sudjelovali su na četverodnevnom seminaru za trenere/ice, koji se održao u Miločeru (Crna Gora). Na seminaru su dva dana obrađivali teme koje se tiču Evropske unije općenito, a dva dana su se usavršavali kao treneri/ce Planske igre. Sljedeća planska igra održava se u SPAJALICI 7. 6. u saradnji s udruženjem Perpetuum mobile iz Banje Luke.



Dan mladih općine Ilidža i Sajam udruženja

Dan mladih općine Ilidža i Sajam udruženja održani su 23. maja ispred SPAJALICE. Organizatori manifestacije su volonteri/ke Udruženja KULT i Savjetodavni odbor mladih Ilidža.

Održana je dječija radionica i maskenbal, gdje je učestvovalo oko 100 djece, od pet do 10 godina starosti. Na Sajmu je 10 udruženja predstavilo svoje programe, aktivnosti i nagrade za dosadašnji rad. Održane su i „Igre bez granica“, u kojima su učestvovali mladi iz srednjih škola.

U večernjim satima održana je svirka grupa „ProRocks“, De Fakto“ i „Mushtuluk“, gdje se okupio veliki broj mladih ljudi koji su uživali u dobroj muzici.



KULT Gradačac

Adresa: Reufa Huseinagića bb, 76250 Gradačac

Tel: 035 818 472, 061 289 669 / 061 193 351

E-mail: mirel.bijedic@kultbih.org

Web: www.kult-gradacac.org



Udruženja KULT Gradačac je i ove godine odlučilo da mjesec maj posveti edukaciji mladih. Na dvije edukativne radionice, koje su održane u Gradačcu 09.05 i 16.05. 2009. godine, bili su pozvani svi mladi koji su zainteresovani za ovu vrstu neformalnog obrazovanja sa područja općine Gradačac. Tema radionica bila je „Planiranje i pisanje prijedloga projekata“. Cilj edukacije je bio da se mladi osposobe da mogu samostalno ili u manjim grupama osmisliti, pripremiti, napisati i realizovati određeni projekat koji je u njihovom interesu. Učesnici edukativnih radionica bili su mladi iz Udruženja KULT Gradačac, Gimnazije Mustafa Novalić Gradačac i Mješovite srednja škole Hasan Kikić Gradačac.

Osim ovih radionica Udruženje KULT Gradačac je organizovalo još jednu edukativnu radionicu koja je istovremeno bila i studijsko putovanje. Radionica je održana na Igmanu u periodu od 22.-24.05.2009. godine. Osim učesnika Udruženja KULT Gradačac tu su bili i članovi partnerske omladinske organizacije Mladi juga Mostar. Tema radionice bila je Organizacijski menadžment i umrežavanje.

Održani su radni sastanci predstavnika Općine Gradačac, Tima za podršku izradi dokumenta "Strategija za mlade općine Gradačac", članova Komisije za mlade Općinskog vijeća Gradačac i predstavnika NVO sektora. Na tim sastancima prisustvovali su i predstavnici Udruženja KULT Gradačac gdje se raspravljalo o daljim koracima u realizaciji dokumenta "Strategija za mlade općine Gradačac".

Završen je projekat „Vodič kroz srednje škole“. Cilj nam je bio da se učenici završnih razreda osnovne škole orijentišu a prije svega dobro informišu o zanimanjima koja postoje u srednjim školama i tako da ostvare pravi izbor jer je ipak riječ o jednoj od najvažnijih životnih odluka.

Teku pripreme za tradicionalnu kulturno zabavnu manifestaciju „Dan mladih 2009“

UDRUŽENJE OBOLJELIH OD HRONIČNIH VIRUSNIH HEPATITISA – "B18", Banja Luka

Adresa: Srđe Zlopogleđe 37, 78000 Banja Luka

Tel: 065/228-923

E-mail: uohcv@blic.net

Web: www.hepatitis.rs.ba



SVJETSKI DAN HEPATITISA 2009

Ove godine Svjetski dan hepatitisa obilježavali smo tokom čitavog mjeseca maja nizom različitih aktivnosti:

- Humanitarni telefon 01-31. maj
- 13. maj - Koncert Fade Out/City pub
- 16. maj - Koncert Muzičke škole
- 17. maj - Park Mladen Stojanović/"Zdravo da ste"
- 18. maj - Press konferencija
- 19. maj - Trg Krajine u Banjaluci/štant
- 20. maj - Trg u Laktašima/štant
- 21. maj - Predavanje/Kulturni centar
- 22. maj - Rock koncert/KSB Index
- Medijske aktivnosti- TV i radio emisije, prilozii, reportaže, novinski članci

Humanitarni telefon

Potpisan ugovor s Telekomom Srpske o aktiviranju Humanitarnog telefona 01-31.maj 2009. god. radi prikupljana sredstava za pomoć socijalno ugroženim osobama koje žive s hepatitisom B i C

Koncert Fade Out&prijatelji

13. maj (srijeda) – City Pub 22h, koncert grupe Fade Out&prijatelji. U veoma prijatnoj i opuštenoj atmosferi u banjalučkom klubu City Pub održan je koncert Fade Out, a gosti večeri bili su momci iz prve postave Balkan Expres. Tokom večeri vršena je podjela promotivnog-edukativnog materijala o hepatitisima B i C.

Koncert Muzičke škole- „Večer gitare“

16.maj (subota) u vijećnici Kulturnog centra Banski dvor sa početkom u 20 h održan je koncert učenika osnovne i srednje muzičke škole „Vlado Milošević“ u Banjaluci. Tom prilikom vršena je podjela promotivnog-edukativnog materijala hepatitisima B i C.



Park „Mladen Stojanović“

17. maja (nedjelja) u prijepodnevnim časovima u parku „Mladen Stojanović“ uz pomoć članova i aktivista Omladinskog centra „Zdravo da ste“ održana je likovna i muzička radionica-škola gitare u prirodi. Također su i PEER edukatori vršili podjelu promotivnog-edukativnog materijala zainteresovanim građanima

Press konferencija

19. maj (ponedjeljak) - Press konferencija Udruženja povodom Svjetskog dana hepatitisa - Internacionalni press centar

Trg Krajine

19.maja (utorak) kao i svake godine na Trgu Krajine u Banjaluci postavljen je montažni štand i tom prilikom su volonteri OKC iz Banjaluke vršili podjelu edukativnog materijala o hepatitisima B i C, te brošurice drugih organizacija koje se bave prevencijom spolno prenosivih bolesti i narkomanije

Laktaši

20.maj (srijeda) - Centralni trg u Laktašima – montažni štand/obilježavanje Svjetskog dana hepatitisa, podjela promotivnog-edukativnog materijala

Predavanje – Kulturni centar

21. maj (četvrtak) - Kulturni centar Banski dvor (vijećnica) 19.00 h – predavanje o virusnim hepatitisima B i C koje je održala dr. Vesna Lučić-Samardžija, spec.epidemiolog.

Rock koncert

22.maja (petak) u KSB Index sa početkom u 21 h u organizaciji Partnerskog omladinskog pokreta / Alternacija održan je rock koncert mladih banjalučkih rock grupa: Suicity, Pandora i Žetoni. Odlična svirka, atmosfera, mladalački duh i entuzijizam obilježili su ovo večer. Također je vršena podjela promotivnog-edukativnog materijala o hepatitisima B i C.



MEDIJSKE AKTIVNOSTI

Potpisivanjem ugovora sa RTRS-a o medijskoj podršci aktivnosti Udruženja povodom Svjetskog dana hepatitisa, snimljena je TV emisija o hepatitisima B i C, „Da li sam ja broj 12?“ koja je emitovana 19. maja, na sam dan Svjetskog dana hepatitisa. O hepatitisima B i C, prevenciji i problemima oboljelih te obilježavanju Svjetskog dana hepatitisa pričali su dr.sc.Zdravka Kezić, načelnik Klinike za infektivne bolesti, dr.sc.Janja Bojanić načelnik službe Instituta za zaštitu zdravlja RS i Zdenko Simonović, predsjednik Udruženja oboljelih od hroničnih virusnih hepatitisa-B18. U informativnom programu puštali su se prilozi i reportaže o dešavanju na Trgu Krajine i press konferencije.

Također 19. maja u večernjim časovima TV HAYAT emitovao je emisiju „Recept za zdrav život“, gdje je kao gost emisije Zdenko Simonović govorio o problemima vezanim za hepatitis B i C, prevenciji i neophodnosti testiranja i liječenja oboljelih.

Pored toga bilo je mnogo nastupa na radio stanicama od kojih se mogu izdvojiti emisija na Radiju RS „Porodica i zdravlje“ u trajanju od 1 h, gdje je gost emisije bio Zdenko Simonović, te uključena u studija Radio BH, UNO radija, Radija Balkan, kao i novinski članci u Glasu Srpske, Nezavisnim novinama...

PRONI, Brčko

Adresa: Bosne Srebrene 16, 76100 Brčko

Tel/fax: 387 49 233 940, 387 49 217 695

E-mail: pronibrco@teol.net

Web: <http://www.pronibrcko.ba>



Svjetski dan Evrope

Na Trgu mladih u Brčkom 9. maja 2009. godine obilježen je Dan Evrope u organizaciji omladinskih organizacija PRONI, Vermont i Svitac, u saradnji sa Euro Info Centrom. Tim povodom odrađene su ulična akcija i konferencija za medije. Na konferenciji za medije prezentovani su rezultati istraživanja pod nazivom „Šta mladi Brčko Distrikta znaju o EU?“, sprovedenu od strane PRONI-a. Na konferenciji je prisutnim novinarima predstavljen rad Euro Info Centra i najavljena ulična akcija na Trgu mladih.

Tokom akcije volonteri i volonterke su dijelili građanima letke sa informacijama o Danu Evrope i Evropskom volonterskom servisu. Tom prilikom prikupljeno je 110 KM u humanitarne svrhe za malog Đorđa Milivojevića, kojem je novac potreban za operaciju koštane srži.



Solidarnost u bitci do ozdravljenja



Nastavak dobrotvorne akcije, u organizaciji Omladinske organizacije „Svitac“ uz podršku Omladinskog centra „Vermont“, PRONI Centra za omladinski razvoj, Škola stranih jezika „Big Ben“, „Seal“ i Kuće prijateljstva „Amica“ u sklopu koje je održana humanitarna predstava za Đorđa Milivojevića, 12-godišnjeg dječaka koji boluje od leukemije. Humanitarna predstava je održana u Omladinskom centru Brčko Distrikta.

U humanoj akciji dana 19.05.2009. godine prikupljeno je **554,50 KM** za liječenje Đorđa, koje se uspješno izvodi u Centru za liječenje djece i omladine Klinika III u Frankfurtu (Njemačka).

Za liječenje je neophodno uplatiti 250 000€ (500.000KM).

Ukoliko se želite pridružiti humanoj akciji i dati svoj doprinos to možete uraditi uplatom na:

Ž.R (KM) 555-003-81015437-58 kod Nove banke AD

Ž.R. (devizni) 555-260-10038433-82 Nova banka AD

„Molimo sve ljude dobre volje da nam pomognu da prikupimo potrebna sredstva, koja će meni i mome sinu pomoći da izborimo ovu bitku do ozdravljenja“.

Unaprijed zahvalna majka Slavica!

Radionice ljudskih prava za mlade Rome

Omladinski radnici PRONI-a već duže vrijeme rade na organizovanju radionica za mlade Rome i njihovoj socijalizaciji na području Brčko distrikta. Posle nekoliko pokušaja da se ova radionica radi u Maoči radionica je zaživjela ali u naselju Prutače, gdje živi većinski romsko stanovništvo.

Ove radionice se odvijaju u saradnji sa IX osnovnom školom u Maoči, koju mladi Romi pohađaju. Već pri prvom sastanku došlo je do razumijevanja između direktora i psihologa osnovne škole u Moči i radnika

PRONI-a. I jedni i drugi su shvatili da imaju iste interese za pokretanje ove radionice, a to je socijalizacija mladih Roma, upoznavanje sa osnovnim ljudskim pravima i pravima manjina, podizanje svijesti o značaju obrazovanja, u što će biti uključeni i roditelji, te pokretanje inicijativa za bolji status Roma u zajednici. Rad na ovom projektu odvijati će se u OŠ u Prutačama do kraja ove školske godine i nastaviti u prvom polugodištu školske 2009/10 godine. Na prvoj radionici prisustvovalo je 12 mladih od 11-15 godina starosti, koji pohađaju školu u Prutačama.

Treninzi sa učeničkim vijećem u OŠ u Bijeloj

Projekat je uspješno priveden kraju sa završetkom maja mjeseca. Rađen je u omladinskom klubu u Bijeloj sa grupom od oko 12 mladih starosne dobi od 12 do 15 godina. Uspješno je odrađeno 30 radionica na temu dječijih i ljudskih prava.

Završna aktivnost je pripremljena od strane učesnika radionice, a to je kviz pod nazivom: "Koliko znam o ljudskim pravima, a koliko o svemu drugom?". Pitanja su na temu ljudskih prava i opšteg znanja. U kvizu su učestvovali članovi po grupama, i to tri grupe:

I grupa učenici 6. razreda

II grupa učenici 7. razreda

III grupa učenici 8. razreda.

Mala škola dječijih prava u Bijeloj

Omladinski radnici PRONI-a uspješno su odradili 25 radionica o dječijim pravima sa djecom iz Bijele starosti od 10 do 13 godina. Sa omladinskim radnicima Senadom Sušićem i Muhidinom Mešićem redovno se družilo oko desetero djece iz ove mjesne zajednice u omladinskom klubu u Bijeloj, već šest mjeseci.

Učesnici su, radeći na radionici dječije pravo - "pravo na igru", došli do zaključka da i pored ovog prava oni nemaju dječije igralište. Zahvaljujući tom zaključku odlučili su da organizuju sastanak sa predsjednikom mjesne zajednice i roditeljima od kojih će tražiti da naprave igralište za djecu u selu.

Ovom akcijom od strane djece iz Bijele dobiven je jedan od rezultata ovog projekta, a to je da se djeca aktivno zalažu za ostvarivanje svojih prava. Učesnici to ozbiljno shvatiti i sami rade na pripremama za sastanak i sami su odradili pozivnice.

Uskoro ćemo imati više informacija o njihovom radu na ovom projektu.

"Treninzi o ljudskim pravima sa učeničkim vijećima u srednjim školama Brčko distrikta"

Učenici srednjih škola u Brčko distriktu prisustvovali su do sada na osam treninga na temu ljudskih prava. Učesnici su grupa mladih starosti od 15 do 18 godina, a dio njih je član učeničkog vijeća. Omladinski radnici PRONI-a Muhidin Mešić i Senada Sušić veoma su zadovoljni radom na ovom projektu, jer oko 15 učenika srednjih škola iz Brčkog redovno dolaze na ove treninge i došli su na ideju da napišu projekat "Restauracija igrališta na Ficibajeru" koji su poslali u FOP SHL (fondacija omladinskih projekata). Očekuju odgovor na ovaj projekat polovinom juna.

Nedavno su učestvovali kao fokus grupa po pitanju problema mladih, u organizaciji Biroa za ljudska prava iz Tuzle. Što dodatno pokazuje koliko su oni aktivni i zainteresovani za rad. Projekat će biti završen sa krajem ove školske godine, što znači još dva treninga. Trenutno obrađuju prava i obaveze unutar porodice na treningu, pošto je nedavno bio dan porodice.

Predviđene aktivnosti u junu

Festival FORA 2009

PRONI Centar za omladinski razvoj i ove godine nastavlja sa organizovanjem festivala omladinskog rada FORA 2009. Ovo je tradicionalni i već deveti po redu festival ovog tipa u organizaciji PRONI-a. Ove godine to je "Festival Bosansko-Hercegovačkog-Švedskog prijateljstva" i drugi dan festivala će biti posvećen švedskoj i bosansko-hercegovačkoj kulturi.

PRONI već uveliko radi na promociji festivala koji se održava 5., 6. i 7. juna 2009.god. na području Brčko distrikta. Ovom prilikom vas pozivamo da nam se pridružite ili učestvujete na festivalu.

UDRUŽENJE MLADI TUZLE

Adresa: Mije Keroševića 3 (Zgrada BKC), 75000 Tuzla

Mob:+387 (0) 61 804 691,

fax +387 (0) 35 280 026

e-mail: mladituzle@hotmail.com,

Web: www.mladituzle.org

Mačak u Čizmama na Međunarodnom Festivalu osvojio III prve nagrade

Pozorište mladih Tuzle sa predstavom MAČAK U ČIZMAMA u režiji Adnana Mujkića, učestvovalo je na 52.Međunarodnom festivalu scenskog stvaralaštva MAJSKE IGRE - Bečej, Srbija 2009.

Predstava se igrala dana 27.05.2009.godine u 11.00h na sceni Gradskog pozorišta Bečej. Gledalište od 450 mjesta bilo je premalo da primi svu publiku, koja Pozorište mladih Tuzle pamti od prošle godine zahvaljujući "svjetskom spektaklu Petru Panu" kako je nazvan na okruglom stolu.

U konkurenciji je bilo ukupno 8 predstava, s time da se Pozorište mladih Tuzle nije takmičilo u konkurenciji za Najbolju predstavu (Na sceni ima starijih od 18 godina).

Mačak u Čizmama (U naslovnoj ulozi je Haris Murić) dobio je III prve nagrade:

- **Azir Mustafić** - Najbolji glumac Festivala po odluci žirija publike
- **Aleksandar Popović** - Nagrada za glumačku transformaciju po odluci stručnog žirija
- **Mirna Sinanović** - I nagrada za plesne koreografije.

U Zrenjaninu odigran Petar Pan

Dan prije samog izvođenja predstave Mačak u Čizmama, na sceni Narodnog pozorišta TOŠA JOVANOVIĆ - Zrenjanin odigrana je predstava PETAR PAN (U naslovnoj ulozi je Dino Tabučić). Sala je bila prepuna publike koji su mlade glumce vraćali na bis 8 puta. Nakon izvođenja predstave odlučeno je od strane Kulturnog centra CEKOM, Opštine Zrenjanin i Pozorišta mladih Tuzle da se tokom 2009. započne raditi na zajedničkoj koprodukcijskoj predstavi koja će svoju premijere imati do kraja 2009.godine.

**Adis Muhibić, Konjic**

Adresa: Civilnih žrtava rata 3, 88400 Konjic

E-mail: adismuhibic@gmail.comWeb: www.konjicani.net

Telefon: 387 61 610-127, 033-280-020 lokal 3343

Konjičani traže postavljanje ležećih policajaca

Projekat «VIA EST VITA – PUT JE ŽIVOT 2009» radni je naziv akcije koju je pokrenula neformalna grupa građana iz ulica Luka i Civilnih žrtava rata MZ Trešanica u općini Konjic i sprovodi se u saradnji sa PU Konjic i radiom Konjic od maja 2009. godine sa svrhom da se omogući siguran život djeci ovih ulica, kao i ostalim stanovnicima ovih kvartova, ali i želi da se doprinese bezbjednosti u cijelom gradu. Sam naziv projekta šalje poruku o univerzalnim vrijednostima života. Građani Konjica sa velikim simpatijama podržavaju inicijativu grupe roditelja i građana da se izbere za veću sigurnost djece u saobraćaju, posebno u blizini škola.

Filozofija projekta je: potaknuti uređenje i izgradnju novih pješačkih staza-trotoara, obilježavanje (novih) pješačkih prijelaza, uvođenje (dodatne) saobraćajne signalizacije i rasvjete uz ceste u blizini dječijih igrališta i škola, te promicanje i poštivanje zone smirenog saobraćaja oko škola. PU Konjic je u više navrata odgovornim licima u lokalnoj zajednici ukazivala na potrebu postavljanja horizontalnih prepreka za umirenje saobraćaja («ležećih policajaca») zajedno sa predstavnicima MZ i NVO udruženjima koja egzistiraju na području općine Konjic. Međutim, kada su konkretne ulice u pitanju rezultat je takav kakav jeste. Potrebna je izgleda kritična masa "pritiska" na lokalnu vlast da opravdane zahtjeve i ostvari ili bar da ne koči njihovo ostvarenje u slučajevima gdje nije direktno odgovorna.

«Povod za pokretanje ovoga projekta je sve učestalije povrede građana u saobraćaju, a uzrok je i neadekvatna signalizacija, nedovoljno označeni pješački prelazi, zakrčeni trotoari. Za posljednjih deset godina u ulicama Luka i Civilnih žrtava rata, dogodilo se 35 saobraćajnih nezgoda, sa 18 povrijeđenih građana. Cilj projekta je da potakne lokalnu vlast na rješavanje ovog velikog problema građana i podigne sigurnost, posebno djece, na mnogo viši nivo. Sigurnost djece i ostalih pješaka ne ovisi samo o ponašanju ostalih učesnika saobraćaja, vozača motornih vozila i dr.. Među bitnim preduvjetima sigurnosti su dovoljan broj pješačkih staza-trotoara i obilježenih putnih prijelaza, te saobraćajna signalizacija i rasvjeta uz ceste, naročito u blizini vrtića i škola. Ovim projektom, mi roditelji, želimo potaknuti lokalnu vlast na rješavanje velikog problema u Konjicu, a to je nesigurnost djece u saobraćaju, posebno u blizini škola i navedenih ulica, kaže Adis Muhibić, koordinator projekta.



O ovoj akciji govorit će se još u programu Radio Konjica i drugim medijima, jer je riječ o inicijativama građana koje su konkretno usmjerene na poboljšavanje života u ovom gradu. Osim toga, uvjereni smo, da će ova neformalna grupa građana biti uporna u svom naumu, jer je njen koordinatorski tim, Adis Muhubić u prošloj godini realizirajući u saradnji sa PU Konjic projekat: «Sigurni parkovi za djecu u gradu Konjicu», za koji je dobio podršku dvadesetpet (25) organizacija, petstotina (500) potpisa građana i podršku Općinskog vijeća i načelnika pokazao, da i građani pojedinci mogu mijenjati stvarnost samo ako se pokrenu i ako su uporni.

NOVE ČLANICE

Dragi prijatelji Omladinska Mreža BiH je dobila novu članicu a to je:

Organizacija:

TVORNICA MAGIJE- MAGIC FACTORY

Maršala Tita 151, 75000 Tuzla

061 722 167

Boris Balta predsjednik

Djelatnosti Udruženja su:

- afirmacija kulturnih vrijednosti Bosne i Hercegovine i stvaralaštva iz ovog područja,
- afirmacija pozorišnog i filmskog stvaralaštva na području tuzlanskog kantona i šire kroz pripremu i realizaciju lutkarskih predstava,
- zaštita digniteta profesije glumaca, dramskih umjetnika i radnika u kulturi,
- organiziranje kulturno-umjetničkih manifestacija, radionica, zabava, stručnih skupova i savjetovanja o pitanjima glumačkog stvaralaštva i kulture,
- učestvovanje u organiziranju izdavanja dramskih i pozorišnih djela, pisanih djela o glumi, pozorištu, filmu i drugih publikacija iz oblasti kulture i umjetnosti uopšte,
- zaštita prava izvođača – umjetnika, uključujući i iznajmljivanje snimljenih izvedbenih materijala,
- zalaganje preko državnih i drugih tijela i organizacija, za formiranje i provođenje kulturne politike u skladu s ciljevima Udruženja,
- davanje poticaja i učestvovanje u razvijanju stručnih i kolegijalnih odnosa među članovima i kulturnim djelatnicima uopšte,

- angažiranje, davanje prijedloga i učestvovanje u proizvodnji dramskih i drugih programa u okvirima dramske umjetnosti i umjetnosti uopšte, te pružanje stručne, tehničke i pomoći druge vrste, drugim umjetničkim i sličnim udruženjima, te organizacijama u realizaciji manifestacija
- saradnja s drugim umjetničkim i sličnim udruženjima i organizacijama s područja kulture u zemlji i inostranstvu, sukladno Zakonu,
- stipendiranje i drugi oblici potpore stručnom usavršavanju članova Udruženja i svih onih lica za koje Udruženje ocijeni da bi njihovo usavršavanje doprinosilo ciljevima Udruženja
- organizovanje seminara, workshopa, treninga, te drugih oblika neformalnog obrazovanja, te davanje savjeta i pomoći iz intelektualnog, PR i drugih domena, a s ciljem promicanja dramskog stvaralaštva, rodni (gender) prava i prava trećih lica,
- izrade publikacija (informativnih, stručnih, edukativnih,) u skladu sa ciljevima i djelatnostima Udruženja
- poduzimanje i drugih aktivnosti potrebnih radi ostvarivanja ciljeva postojanja Udruženja, sukladno zakonu.

INFORMACIJE

K o n k u r s

za sufinansiranje zajedničkih naučnoistraživačkih projekata u okviru naučne i tehnološke saradnje između Bosne i Hercegovine i Republike Slovenije za 2010. i 2011. godinu.

Predmet konkursa:

Predmet konkursa je sufinansiranje međusobnih naučnoistraživačkih projekata istraživača iz Bosne i Hercegovine i istraživača iz Republike Slovenije koji rade na zajedničkim projektima.

Kriteriji za odabir projekata

Kriteriji za odabir projekata za sufinansiranje su:

- a) značaj rezultata istraživanja za ekonomski i društveni razvoj Bosne i Hercegovine,
- b) naučna vrijednost i/ili primjenjivost istraživanja,
- c) potencijalna mogućnost za uključivanje u istraživačke projekte EU,
- d) upotrebljivost rezultata istraživanja u praksi, odnosno u ekonomiji zemlje,
- e) reference istraživačke grupe,
- f) uključivanje mladih istraživača,
- g) izvodljivost projekta.

Sve projektne aplikacije koje podnose aplikanti iz Bosne i Hercegovine moraju ispunjavati opće i posebne uvjete odredbi pravilnika/kriterija o sufinansiranju naučnoistraživačkih projekata koje primjenjuju Federalno ministarstvo obrazovanja i nauke (za aplikante s područja Federacije Bosne i Hercegovine) i Ministarstvo nauke i tehnologije Republike Srpske (za aplikante s područje Republike Srpske), a na bazi kojih će biti vršeno vrednovanje podnesenih projekata.

Vrijeme izvođenja zajedničkih projekata:

Vrijeme izvođenja zajedničkih projekata je dvije godine.
Predviđeni termin početka rada na projektima je 1.01.2010. godine.

Prijava na konkurs:

Prijava na konkurs se podnosi Ministarstvu civilnih poslova Bosne i Hercegovine, putem entitetskih ministarstava nadležnih za nauku (Federalno ministarstvo obrazovanja i nauke, Ministarstvo nauke i tehnologije Republike Srpske).

Prijava za konkurs treba da sadrži sljedeće elemente:

- a) naziv projekta,
- b) podatke o instituciji koja predlaže projekat,
- c) podatke o glavnim istraživačima na projektu iz Bosne i Hercegovine i iz Republike Slovenije sa njihovim najznačajnijim publikacijama koje se odnose na sadržaj projekta, a objavljene su u posljednjih 5 godina,
- d) detaljan opis projekta sa očekivanim rezultatima,
- e) plan razmjene posjeta bh. i slovenačkih istraživača za svaku godinu projekta.

Prijave projekata na konkurs podnose se na obrascima koji se mogu preuzeti sa web stranice Ministarstva civilnih poslova Bosne i Hercegovine www.mcp.gov.ba (link konkursi), odnosno entitetskih ministarstava nauke www.fmon.gov.ba i www.vladars.net.

Omladinski certifikati

Omladinski certifikat služi za prepoznavanje i potvrđivanje neformalne edukacije u sklopu programa Mladi u Akciji, također je postala dostupna i za Omladinske Razmjene i Trenerske kurseve u sklopu Akcije 3.1. Kao dodatak nadolazećim projektima, certifikati se mogu kreirati retroaktivno za sve Omladinske Razmjene i Trenerske kurseve odobrene od 01.01.2007. Omladinski certifikati se mogu kreirati na internetu www.youthpass.eu koristeći projektni broj dobiven od Nacionalne Agencije za Edukaciju, Audio-video i Izvršnog tijela za kulturu koji dodjeljuju projekte.

Korisnici bi trebali pročitati vodič za Omladinske certifikate koji sadrži informacije o razvoju omladinskih certifikata, kao i tehničke informacije vezane za kreiranje certifikata. Vodič možete naći na internet stranici: <http://www.youthpass.eu/en/youthpass/guide/>

DONATORI / STIPENDIJE / ŠKOLARINE / NAGRADE / POSLOVI / PRILOZI

Poziv za apliciranje
Ochberg Stipendija

Odgovorno izvještavanje o nasilju i traumatičnim događanjima, kriminalu, obiteljskom nasilju, prirodnim katastrofama i nesrećama, ratovima i genocidu su neke od najodgovornijih izazova sa kojima se susreće moderno novinarstvo. Dart Centar Ochberg je osnovan od strane Međunarodnog društva za studije o traumi kao i Dart Centra a sve u cilju što bolje pripremanja novinara za njihove izazove.

Dart Centar pruža šest ili više stipendija za novinare koji žele aplicirati i naučiti pratiti nasilne događaje.

Stipendije su namijenjene izvještačima, fotografima, urednicima i producentima sa najmanje 5 godina iskustva u profesiji. Zbog ograničenih sredstava ovaj poziv se odnosi na novinare iz Evrope, Amerike, Australije i Novog Zelanda.

Stipendisti će pohađati dvodnevni seminar koji će se održati 3 i 4 Novembra 2009 u Atlanti, USA, na seminaru će se pričati o ulozi trauma na medijsko izvještavanje.

Više informacija na: <http://dartcenter.org/ochberg-fellowship-guidelines>

Dragi prijatelji,

Ukoliko ste zainteresovani da se u mjesečnom informativnom biltenu Omladinskog Resursnog Centra (ORC) Tuzla i Omladinske mreže Bosne i Hercegovine objave: vaši pozivi za zajedničke aktivnosti i saradnju, informacije o aktivnosti, konkursi za radna mjesta, apeli za pomoć ili podršku, saopštenja za javnost i svi drugi nekomercijalni oglasi, možete se javiti na jednu od dole navedenih adresa.

Rok za dostavljanje informacija za svako naredno izdanje je 30.-ti u mjesecu.

WEB Stranica Mreže:
sCh design
Webmaster:
Emir Delalić-Zeko - Tuzla
emir.delalic@gmail.com
emirdelalic@yahoo.com

web: www.omladina-bih.net
mejling lista Mreže:
mailing@omladina-bih.net

Adrese za slanje vaših informacija za mjesečni bilten:
orcuzla@bih.net.ba
fax: 035 258 077

hCa Tuzla
Hadži Bakirbega Tuzlića 1,
75000 Tuzla
tel / fax: 035 258 077
e-mail: orcuzla@bih.net.ba
hcatuzla@bih.net.ba

hCa Banja Luka
Krfska 84, 78000 Banja Luka
tel: 051 432 753,
fax: 051 432 752
e-mail: hcalido@inecco.net
hcabl1@blic.net

Mjesečni bilten uređuje Omladinski resursni centar - ORC Tuzla